

關中金石文字存逸考

關中金石文字存逸考卷六

揚州甘泉毛鳳枝撰

咸陽縣

秦

蘭池宮當瓦

篆書

未詳所在

出咸陽元和郡縣志云秦蘭池宮在咸陽東二

十五里

十二字瓦

篆書

未詳所在

文曰維天降靈延元萬年天下康甯

此瓦出咸陽

鳳枝

案銘詞三句叶韻似秦碑體

小篆字體茂密疑詞翰亦出斯翁也長安縣志
云長安城南往往有之

西魏

司空周惠達碑

人分書

大統十三年

逸

全文未見

石墨鐫華云此碑乃咸陽令王君

家瑞

所得文

見咸陽金石遺文案此石今久逸矣

北史西

魏書皆有周惠達傳案西魏書惠達卒於大統

十年而此碑立於大統十三年大統西魏文帝

年號也石墨鐫華云碑額題曰大魏故司空匡

穆周公之碑銘篆書十二字是惠達固魏臣矣
北史列於周臣傳中不解其故謝蘊山中丞
昆始列之西魏書中可以定李氏之譌惠達諡
匡穆兩傳均未載得此可補其闕

北周

邑子五十人等造像記

正書

武成二年二月

存

全文見金石萃編補遺

記云於長安之北渭水之陽造釋迦石像一區
所云長安城乃漢長安城也在今西安府城西
北十餘里

一名陽甲城
又名未央宮

又曰渭水之陽則在渭

北矣竇宇訪碑錄有後周武成二年二月王妙暉等五十人造像銘在咸陽卽此碑也

少保豆盧恩碑

庾信撰正書
天和元年二月六日

逸

全文見庾開府集中備錄如左

周隴右總管長史贈太子少保豆盧公神道碑

節錄觀魯王氏璠

注釋并加考證焉

君諱恩字永恩

鳳枝案倪注庾集作君諱永恩字某北史豆盧甯傳但言永恩

而闕其名今從金石文
字記據碑文改定焉

昌黎徒河人本姓慕容

燕文明帝銑之後也朝鮮箕子之封孤竹伯夷之國漢有四城秦爲一候其先保姓受氏初存

柳城之功開國承家始靜遼陽之亂自天市星

妖連津兵覆尙書府君改姓豆盧筮仕於魏

北周

書豆盧南傳云高祖勝以燕皇始初歸魏授長樂郡守賜姓豆盧氏祖代左右將

軍魏文皇帝直寢父長少以雄畧知名不幸早

世

北周書豆盧南傳云父長柔元鎮將有威重見稱於時

周朝以公兄弟

佐命義存追遠

兄弟謂南及恩也

保定二年有詔贈柱

國大將軍涪陵郡公

鳳枝案北周書豆盧南傳云其父長贈官爵事在武

成初此云在保定二年碑傳互異焉是知春雨潤木白葉流根西

伯行慶推存及沒公以山岳精靈星辰秀異氣

侔鐘鼎聲感風雲觀於秦兵尙稱童子對於楚

戰猶在青衿太祖文皇帝

周太祖字文泰也

乘時撥亂

奄有霸業潁川從我舊愛無渝春陵故人相知

惟眷晉泰二年關西建義授殄寇將軍

北周書豆盧甯

傳云歸太祖授此官

奉迎大駕賜封新興縣伯邑五百戶

開新安之鄉仍移楊僕之關解宏農之圍更入

劉昆之郡援桴併轡并預前驅大統三年有沙

苑之戰四年有河橋之役

北周書豆盧甯傳云恩在魏武時屢逢征

討皆有功沙苑河橋恩皆與戰矣

介冑蟻蝨戎馬生郊公應變

愈長風颭更勇隱若敵國差強人意授龍驤將

軍中散大夫八年授直寢右親信都督尋轉大

都督加通直散騎常侍十六年授使持節車騎

大將軍儀同三司魏元年北周書豆盧南傳云魏廢帝元年也授

驃騎大將軍開府儀同三司鄧瞞以漢朝親戚

始授中台黃權以魏國忠臣初登上將公頻煩

寵授頻煩謂重疊也二字屢見三國志中杜詩三顧頻煩天下計亦即重疊之義附記於

此朝野爲榮二年都督成州諸軍事成州刺史

尋加侍中外總連帥威震百城內參常伯榮高

入舍蔡質漢儀曰侍中常伯員本八人於時隴坻黠羌時穿上

谷榆中羣賊或據漁陽公卷甲星馳長驅千騎

迴樂凶徒望風草靡瓜州豪傑束手歸罪後魏

元年

北周書豆盧甯傳云魏恭帝元年

改封龍支縣侯

鳳枝案北周書

豆盧甯傳作龍來來係支字之誤蓋隋書地理志有龍支而無龍來

三年朝廷使

大將軍安政公

安政公者史甯也北周書有傳

隨突厥吐谷渾

歸國河鄯二州屬當路首公領騎八千以為戎

防南通丹粟西望白蘭關塞無虞公之勳也周

元年

北周書豆盧甯傳云孝閔帝踐阼之年也

授都督鄯州諸軍事

鄯州刺史其年改封沃野縣公增邑千戶二年

授隴右總管府長史武成元年都督利涉汶三

州諸軍事利州刺史

北周書豆盧甯傳涉作沙汶作文當從之今醴泉縣

昭陵有唐芮公豆盧寬碑云祖承恩口利沙文四州刺史可證涉當作沙汶當作文矣下文破

文州陽陳蠻卽此文州尤足證汶字之誤倪注
據本傳改涉爲沙而又謂沙州爲酒泉之鳴沙
汶州爲蜀之汶山郡其說尤誤鳳枝案方輿紀
要云魏廢帝三年改西益州曰利州在今四川
廣元縣境西魏所置沙州治景谷縣在今四川
昭化縣西百里北周明帝二年以葭蘆郡置文
州在今陝西文縣境三州地界相連故以恩都
督三州諸軍事也若倪注謂酒泉南有鳴沙故
曰沙州又云隋志汶山郡後周汶州案酒泉今
爲肅州在甘肅西邊汶山郡今爲茂州在四川
西北邊與利州相距極遠有鞭長莫及之勢豈
能合三州而督之也文縣今爲甘肅階州直隸
州二年兵破文州陽陳蠻仍平瀘水方輿紀要云陝西文
屬西有黑水源出素嶺山下流會于白水水經
注黑水出西南羌中鳳枝案鄯道元云水色正
黑曰盧此瀘水卽盧水亦卽黑水矣西魏以保
嘗於文州置盧北郡當因盧水而名焉
定元年將兵破巴州恆獫狁獫狁北周書作稜渡瀘五月

葛亮有深入之兵長坂九迴王遵有忠臣之路

霜雹不驚水草無乏天幸將軍斯之謂矣其年

授司會

北周書保定元年入爲司會中大夫

入法斯掌九賦是均

事總歲成功參日要三年還授隴右總管府長

史公屢弼英蕃頻相大府北海入朝仰以對問

東平謁帝因而言禮遂使馬首懷燕不無樂毅

蕃臣擬漢或多田叔兄楚國公

謂豆盧甯也

以參和

挹讓莊贊樂推建國開都奄荒南服求以先封

武陽郡三千戶益公沃野之封朝廷以兄弟相

讓不無前史推恩分邑有詔許焉增邑并前合

四千七百戶旣而六氣相犯五聲相觸靈壽不
終遊魂且變薨於官舍春秋五十八詔贈少保
幽冀定相等五州諸軍事幽州刺史諡曰敬公
禮也天和元年二月六日葬於咸陽之洪瀆川
大夫墓樹以柏諸侯墳高於雉嗚呼哀哉公資
忠履孝蘊義懷仁直幹百尋澄波千頃畱心職
事愛翫圖籍官曹案牘未嘗煩委戎馬交馳不
妨餘裕兄弟公侯國朝親戚宜春有湯沐之盛
濯龍無流水之譏渭南千畝之竹尙懼盈滿池
陽二頃之田常思止足立身則十世可宥遺子

則一經而已。刺史賈逵之碑既生，金粟將軍衛
青之墓方畱石麟，乃爲銘曰：朝鮮建國，孤竹
爲君。地稱高柳，山名密雲。遼陽趙裂，武遂秦分。
寶珪世胄，雕戈舊勳。名稱實實，言謂身文。挺此
含章，降茲岐嶷。有犯無隱，王道正直。惟愛惟敬，
永成悅色。枕藉禮闈，畱連學殖。策參帷幄，功披
荆棘。韓陣揮戈，齊城憑軾。豹策乃建，龍韜同啓。
校戰岐陽，申威隴坻。城壘畫地，山林聚米。上馬
諭書，臨戎習禮。賈復開營，廉公屈體。從容附會，
占對造請。用此廉平，終茲寬猛。綠林兵息，潢池

盜靜名振赤山威高青嶺元獸浮河飛蜋出境
災氣生隴毒水浸涇朝傾地鎮夜落台星石壇
承祀豐碑頌靈渭城高柏昌陵下亭須知地市
爲讀山銘

石墨鐫華云史恩附兄甯傳曰永恩今據碑蓋
以字行耳碑稱保定二年贈柱國大將軍涪陵
郡公史稱贈少保幽冀等五州諸軍事幽州刺
史謚曰敬似當以碑爲正碑在咸陽恩墓前隸
書令尹王公家瑞求得之余摹一紙多不堪讀
而王公所刻金石遺文尙存強半蓋從碑下錄

之耳 鳳枝案此碑爲庾信所撰文載集中已

詳錄如右矣石墨鐫華謂恩所贈官爵碑與史

異似當以碑爲正今以庾集考之上柱國涪陵

郡公乃追贈恩父長之官爵也少保幽冀等五

州諸軍事幽州刺史乃追贈恩之官爵也石刻

剝落趙子函未見全文所以致疑也前人疑寶

久未能析得全文疏通證明之書罷爲之一快

文云天和元年二月六日關中金石記列此碑於保定元年石墨鐫

華列此碑於後魏均誤葬於咸陽洪瀆川關中金石記云

碑在咸陽洪瀆原與庾集合洪北江乾隆府廳州縣志云洪瀆原

在咸陽縣北二里 此碑既出名手惜石刻久逸故錄其

全文詳加考證亦可爲補注庾集之一助焉

余于關中碑誌搜羅最勤惟周惠達及此碑并常醜奴梁羅兩誌均未見過拓本是可異也

朱竹垞曝書亭集碑跋云康熙戊子曾觀此碑於稼堂潘氏書屋惜後幅漫漶不能卒讀矣北周書及北史恩事附見其兄甯傳後北周書所紀較北史爲詳焉

唐

睦州刺史張琮碑

于志甯撰正書
貞觀十三年二月

存

全文見金石萃編

雍州金石記云今在咸陽縣西北三十里雙照村案此碑字迹遒勁頗近歐虞唐初佳刻也

道王府典軍朱遠墓誌銘

正書

咸亨四年二月未詳所在

全文見古誌石華續編

誌畧云公諱遠字元通曾祖廣鎮軍大將軍祖綽齊洛州長史父寬隋嵐州司馬公解巾擢拜絳州同鄉府果毅轉爲道王府典軍咸亨三年九月二十五日卒於大賢里之私第春秋七十有五卽以四年二月二十八日遷葬於咸陽之

原禮也嗣子護任三原縣天齊府左果毅

案此誌未詳所在因其葬地在咸陽故屬之咸陽云爾道王名元慶高祖子見新唐書高祖諸子傳絳州同鄉府之同新唐書地理志作桐蓋音同字異也又志云關內道京兆府有府百三十一志中有名者僅十一府其餘皆逸此誌所載三原縣天齊府卽百三十一府所逸之一也天齊府亦見三原縣齊士員造像記

順陵殘碑

武三思撰相王旦正書
長安二年正月

逸

全文見陽湖孫淵如觀察

星衍

平津館叢書續

古文苑中

今在咸陽縣署番禺姚壽農大令國齡跋云石

墨鐫華云碑已仆於乙卯之地震而亡於縣令

之修河乾隆間朱楓著雍州金石記云近於渭

河岸崩出順陵殘碑一移縣署二在民間一存

百三十五字一存四十八字又一存三十六字

國齡莅咸邑詢知三段俱在署內其百三十五

字者已裂而爲二一存六十二字一存五十二

字其四十八字者今存四十一字三十六字者

僅存二十五字因飭工嵌之東壁以垂不朽時

道光戊申孟冬之月咸陽令番禺姚國齡壽農
氏記又上元馬棐斐刺史毓華官咸陽知縣時
於同治丙寅重修

文廟於牆陰又得一石計二十九字亦嵌署內東壁
又一石僅存一海字共六石焉

金石文字記云此碑首曰大周無上孝明高皇
后碑銘并序特進太子賓客監修國史上柱國
梁王臣三思奉勅撰太子左奉裕率兼檢校安
北都護相王臣旦奉勅書此武后追尊其母楊
氏之碑其時睿宗爲相王奉勅書之字體與景

龍觀鐘銘同

百官志東宮官太子左右內率府龍朔二年改曰左右奉裕衛正四

品上大都護府大都護一人從二品奉裕衛之衛碑作率字

涼國公契苾明碑

婁師德撰殷元祚正書先天元年十二月

存

全文見金石萃編

雍州金石記云在咸陽縣北五里藥王洞後咸

陽金石遺文云在縣北五里雙泉洞

贈沁州

本作池州據潛研堂金石文跋尾改刺史馮仁口碑

崔尙撰郭謙光入分

書

開元十一年十一月

未詳所在

全文見咸陽金石遺文又見金石萃編

石墨鐫華云此當是道士馮道力父名仁口字

太元

金石文字記引碑文云長樂人馮文王之允也

道士與劉承祖占

元宗當受命潛布款誠開元中拜道力銀青光祿大夫冀國公而又拜其父朝散大夫使持節沁州諸軍事沁州刺史也開元十一年五月卒十一月壬申葬咸陽建碑

王

家瑞

咸陽金石遺文跋曰右碑在縣東四十

里漢長陵西下里許野中字八分書剝落過半存者儘有可玩近下半入土中北望平行莫識墓之所在拂拭苔蘚辨別形似讀之如右郭監丞當時名筆又分書唐太子右庶子韋維碑古

碑考載在京兆向未搜得見是碑亦差慰想并
記鳳枝案此石今未詳所在矣 潛研堂金石
文跋尾云此碑文多漫漶其篆額云大唐故朝
散大夫守沁州刺史馮公之碑凡四行十二字
完好可讀此碑歐趙錄皆無之始見於寶刻類

編

鳳枝案類編作沁州刺史馮仁碑仁字下不空格

近世金石家題爲

池州由未審篆文之故考唐書地理志池州武
德四年以宣州之秋浦南陵二縣置貞觀元年
州廢永泰元年復析宣州之秋浦青陽饒州之
至德置碑立於開元中其時未有池州也據寶

刻類編云碑以開元廿二年立

諸城劉燕庭觀
察喜海所刻寶

刻類編作開元十一年與
竹汀先生所見之本異焉

今磨滅莫能辨矣

廣化寺無畏不空禪師塔銘

正書

開元二十五年八月存

全文見金石萃編

關中金石記云在咸陽縣窰店鎮廣化寺宋人

重刻字迹甚劣

清河郡太夫人張氏墓誌銘

宋元愛撫男林有鑒正
書 天寶九載五月

逸

全文未見

金石文字記云在咸陽縣案此石今久逸矣

左神威大將軍焦𦉰碑

寶刻類編云從弟郁異朱獻任行書貞元十八年七月

未詳所在

今將所存之字備錄如左

第一行

唐故雲麾將軍守左神威大將軍知軍

事兼御史

缺

第二行

從弟登仕郎京兆府涇陽縣尉

缺

第三行

天列將星所以資警衛也 國寵武官

所以威暴

缺

第四行

身是任生死以之亦何代無其人乎公

諱𦉰字

缺

第五行

因氏焉爾後祚土分榮承家繼祉儒林

著傳外黃究陰陽

缺

第六行

曾祖誨孝廉登科終衢

缺

第七行

父伯瑜開府儀同三司檢校右散騎常

侍兼右龍武軍大

缺

第八行

長子也爰在童幼即便弓馬義勇自立

果斷有謀以爲書

缺

第九行

年十六河東節度辛公始以將門子擢

昇勇爵泊河北俶

缺

第十行

列則掉鞅鼓勇數闔示閑引顏高之六

鈞復養由之一矢

缺○碑至此中裂爲兩扇焉

第十一行

搜三軍得勇悍之最

缺

第十二行

聖上有梁洋之蒐六軍之師中亦散

潰公總其部下爲

缺

第十三行

前射生左虞侯加御史中丞進封高

平郡王食邑二千戶

缺

第十四行

宜署善名因改爲左右神威軍累遷

公充左神威大將軍

缺

第十五行

寄以心腹有頃遷御史大夫依前知

軍事方將備以時須

缺

第十六行

十八年二月十八日寢疾薨於神威

之軍舍

下空

第十七行

十九日葬於咸陽原於戲以涪陵盛

業肇啓於天寶之末

缺

第十八行

四朝輝映冠於一代迥瞻往古鮮有

其儔宜乎享以遐齡

缺

第十九行

幽冥杳然孰知所向嗣子忻王府參

軍戔次子雅王府參

缺

第二十行

未泯郁忝茲宗末實飫英猷承命爲

文庶表陵谷銘曰

第二十一行

允周孕靈輔唐降精端肅雄毅實

生高平高平

缺

第二十二行

王鑾輿返正亦克衛 聖心腹內

輸爪与外靖

缺 此行之後有字半行僅存殘畫不可辨識故不載焉

此碑載於寶刻類編書撰人名年月日具至今則僅存半截惟碑末云郁忝茲宗末則撰文之名尚存也碑云爰在童幼即便弓馬旣蓋以武功起家也河東節度辛公謂辛雲京也聖上有梁洋之蒐六軍之師中亦潰散公總其部下云云聖上謂德宗也李懷光之變德宗出幸梁洋

號總禁兵以從得封高平郡王蓋亦興元元從
功臣也碑有儒林著傳外黃究陰陽之語蓋用
漢書焦贛事贛字延壽卽撰易林者漢書本傳
云贛爲小黃令荀悅漢紀作外黃令碑作外黃
蓋本漢紀也小黃外黃二縣漢時均屬陳畱郡
又案漢書京房傳云焦贛名延壽字贛又儒林
傳京房傳師古注云焦贛名贛延壽乃其字也
二說不同此碑一帖賈云同治時出於興平
今并存之

未能實指其處因其葬地在咸陽故仍屬之咸
陽焉析王名造雅王名逸均代宗子見新唐書
十一宗諸子傳新唐書兵志德宗貞元三年改

殿前左右射生軍曰左右神威軍又百官志云
殿前左右神威軍有大將軍二人正二品 又
案此碑第二行題銜云從弟登仕郎京兆府涇
陽縣尉卽焦郁之題銜全唐詩鈔有白雲向空
盡五言排律一首係郁所作小傳云郁爲元和
閒人卽撰此碑之焦郁矣唐時縣尉多由進士
調選白雲向空盡詩係郁應試之作也 寶刻
類編所載又有焦伯瑜碑邢叔度撰孫藏器行
書元和十四年立在京兆卽旣父伯瑜碑也今
未詳所在矣王伯厚姓氏急就篇焦姓下注云

唐有焦伯瑜卽其人矣

安國寺寂照和尚碑

段成式撰僧无可正書
大和七年十二月

存

全文見金石萃編

雍州金石記云今在咸陽縣城內安國寺

石墨鐫華云此碑在咸陽馬跑泉地中武功康

子秀先生過而識之以語土人豎於道旁其後

王咸陽

家瑞

移之咸陽城中寺以碑有安國寺

字遂改其名爲安國寺按碑段成式撰僧无可

書成式文筆自奇此文爲佛言尤奇无可賈島

從弟有詩集傳世其書法出柳城懸而優孟者

子秀名楷太史德涵子也

王咸陽

家瑞

咸陽金石遺文跋曰碑舊在縣西

三十里馬跑泉今移置縣寺階下聞初康牧識
而出之土中牧號小山對山子也 金石文補

云碑文險怪用內典字極夥樊宗師之流亞也
潛研堂金石文跋尾云寂照俗姓龐氏京兆興
平人父詮灌鍾府折衝蓋亦雍州百三十一府
之一而史之所佚也 段成式字柯古文昌子

附見新唐書文昌傳中所爲文與溫庭筠李商
隱齊名時號三十六體以三人皆行十六也

長安縣尉楊籌妾王氏墓誌銘

正書

咸通五年五月

未詳所在

全文見古誌石華

或云此石在咸陽賈村程氏今未詳所在

龍華寺窣堵波塔銘

高壩撰并正書
咸通五年八月

存

全文見金石萃編

關中金石記云在咸陽龍華寺

修武安君白公廟記

正書

乾符五年十二月

逸

全文見金石萃編

武安君秦將白起也石墨鐫華云廟在咸陽縣

東古杜郵此碑正書遒勁亦有歐法關中金石記云此碑在咸陽東廂內案此石今久逸矣此碑拓本亦未見過

興平縣

漢

黃山宮瓦

篆書黃山二字

未詳所在

秦漢瓦當文字云俞太學得自興平漢書地理志槐里有黃山宮孝惠二年起長安志云興平黃山宮在縣西南十里

千金宜富當貴瓦

篆書千金二字在中央

未詳所在

秦漢瓦當文字云出興平縣北一里所黃麓山下黃麓山一名北芒巖方輿紀要云始平原在興平縣治北二里亦曰北芒巖原長數百里或曰卽咸陽北阪之別名也北芒西原或謂之黃山志云縣北一里卽黃麓山鳳枝曾過其地其陵墓多在其上蓋亦猶洛陽之北邙也

鬼氏冢舍瓦

隸書

未詳所在

秦漢瓦當文字云錢別駕得於馬嵬案馬嵬在今興平縣西二十五里鬼氏瓦出於其處然則馬嵬之地固因鬼氏所居而得名也

隋

海陵郡公賀若誼碑

正書

開皇十六年八月

存

全文見金石萃編

今在興平縣文廟中

枝

曾親見此碑字畫精

整隋刻之佳者可寶也惜下截模糊耳雍州金

石記云碑陰宋人刻

夫子廟堂記關中金

石記作大觀聖作之碑二說不同今并存之

安喜公李使君碑

入分書

開皇十七年二月

存

全文見金石萃編

金石萃編云此碑在興平縣馬嵬堡北五里石

墨鐫華云在乾州上官村案乾州東南與興平
接界此碑之出必在交界之所故兩說不同今
之拓本則多由興平而來故仍屬之興平焉
又案趙岫遊九嶷山記云將遊九嶷憶馬嵬堡
北五里有隋李使君碑遂渡渭先之馬嵬不及
授餐詣碑所云云其紀遊詩則南上官村觀李
使君碑詩題之下卽書馬嵬驛亦是武帝黃山
宮詩題考遊記旣云不及授餐卽詣碑所而南
上官村與馬嵬驛二詩連屬而書則南上官村
與馬嵬驛固相距咫尺也 又案碑云厝於口

西縣交州云云西字上缺一字當係莫字隋書
地理志京兆郡上宜縣開皇十七年置有舊莫
西縣十八年改名好時大業三年廢入焉方輿
紀要云好時廢縣在陝西乾州東南四十里漢
縣屬右扶風後魏太和十一年改置漠西縣屬
武功郡隋開皇十八年改爲好時縣大業三年
廢入上宜縣此碑所出正在乾州東南是今興
平縣馬嵬堡北之地在隋時固屬漠西縣矣至
交州二字乃漠西縣鄉里之名也

崇澤縣令常醜奴墓誌

正書

大業三年八月

逸

全文備錄

隋都督榮澤縣令故常府君墓誌

君諱醜奴扶風始平人也黃運肇興旣冠冕於
東國金行失馭遂流奔於西土亂離瘼矣從姑
臧之客遊天保定爾爲鄴善之強族祖黑獺門
傳劍騎久雄汧隴授大都督領本州兵父歆立
履口毅志懷剛勇魏明帝去河洛之玉里遷崤
函之帝宅經綸王業實寄腹心以君關右豪室
詔追宿衛任右旅侍累遷直寢言遊京輦爰賜
井田去六郡之桑麻承三輔之風俗民良土樂

因以家焉君器局真正識度詳雅弦揮鴈落筆
動雲奔保定元年起家右勳侍下士鵬搖始展
鴻漸初飛式允折衝口推英果五年轉膳部下
士位因寵進爵以才升鼎飪攸宜肴饗惟禮建
德元年遷天官府治中士司會治本文昌樞密
是日登賢良稱德舉皇朝續運寶命惟新君養
志家園深知正足開皇十九年明詔以周代文
武普加優選蒙授都督又授鄭州滎澤縣令中
牟乳雉非獨魯君重泉宿鸞甯惟王阜祿滿言
歸縱情邱壑方違日秩庶永月存而漏盡鳴鐘

歌哀曳杖奄焉不憖遽矣上賓大業元年十一月十九日終於神皇鄉宅春秋八十有六夫人宋氏人推貞婉族茂金張未永修齡早辭明世以今三年歲次丁卯八月丁丑朔廿六日壬寅合葬於本縣湯臺鄉之始平原禮也君孝以承親誠惟事主愛賢重士輕財守信文淵□□差得相方次公投轄足爲連類而徽猷長往蘭□空傳知與不知有識同恨于監州五原縣令緒等兄弟並克隆堂構無騫負荷出忠入孝揚名顯姓若趙嘉逸士猶題圖石繆韻文宗尙銘泉

礎嗚呼哀哉乃爲頌曰節全奉使仁兼分穀
烈烈太常巖巖光祿降神餘慶誕膺多福惟祖
惟禰世雄邊服波瀾罔已挺生吾子肩席承顏
腰鞬入仕見利思義在官能理卓犖韶年優遊
暮齒逝川難息離光易侵昭塗倏晦大夜遄深
口墳共掩口藏俱沈九原永畢千載騰音
右一碑今佚顧氏謂在興平縣崇甯寺中此祖
趙岫之說寺今亦不可考鄙人爲此碑踏破芒
鞋矣

石墨鐫華云醜奴始平人爲都督榮澤令大業

元年卒誌在興平崇甯寺壁閒爲童子摩挲殘
平余捐一紙書亦不大佳但以隋物存之興平
卽古始平今不知墓所在

關中金石記云石方尺餘在興平縣字甚精整
案朱氏近漪根修雍州金石記時此石已逸蓋

其湮沒久矣陝中古誌原石雖亡而拓本尙可
覓得惟此誌及梁羅墓誌購求廿餘年迄未見
過拓本是可怪也幸興平縣志載有全文備錄
如右以備茂陵掌故焉 潛研堂金石文跋尾

云誌稱後魏孝武帝爲明帝此他書所未見也

○東觀漢記王阜爲重泉

漢縣屬左馮翊今陝西蒲城縣

令有

鸞鳥止於學宮阜令掾沙疊爲張雅樂鸞應聲

而舞止縣庭畱十餘日乃去誌中重泉宿鸞甯

惟王阜卽用此事惟興平縣志誤阜爲昇今從

東觀漢記改又後漢書趙岐傳岐爲太常年九

十餘建安六年卒先日爲壽藏圖季札子產旻

嬰叔向四像居賓位又自畫其像居主位皆爲

讚頌誌中趙嘉逸士猶題圖石卽用此事蓋趙

岐本名嘉字臺卿後乃更名岐字邠卿也又誌

中繆韻文宗尙銘泉礎韻字疑襲字之譌三國

志魏志繆襲字熙伯東魏李憲墓誌云胡公有
銘棺之義熙伯著書版之辭卽用繆襲故事唐
封氏聞見記封演撰引王儉說魏侍中繆襲改葬

父母制墓下題版文欲後人有所聞知卽此事
也又無騫負荷騫字亦疑有誤因無石本可證
姑仍其舊蓋石刻一經傳寫卽有譌舛而縣志
又係官書校勘不精故亥豕尤多也又案梁羅
墓誌內用大漸字樣顧亭林謂大漸彌留等字
古人原可通用今案此誌用上賓二字與唐內
侍王守琦墓誌見咸寧縣志書卒爲崩同一謬妄而

此誌文筆典贍乃駢文之佳者獨於稱謂舛謬
如此是可異也 誌云醜奴之父歡任右旅侍
屢遷直寢醜奴起家右勳侍下士轉膳部下士
遷天官府治中士司會案右旅侍直寢西魏書
職官考均未載北周書宇文護傳有膳部下大
夫膳部下士卽其寮屬也叱羅協傳有司會中
大夫天官府治中士司會亦其屬也右勳侍下
士北周書未載西魏書百官考有之

秦州參軍張璠墓誌銘

張晏撰正書
天寶十二載二月

未詳所在

全文見古誌石華續編

誌畧云公諱璈字承宗清河東武城人也曾祖
淵隋開府儀同三司江南遼東二道行軍總管
衛尉卿上大將軍文安縣開國公食邑壹千戶
諡曰莊祖孝雄唐尙輦直長湘源令鄴府司馬
考敬之侍御史司勳郎中乾封縣令漢州刺史
太府卿禮部侍郎公卽侍郎公之元子也弱歲
以宿衛出身中年以常調廢職授秦州參軍事
以神龍二年十一月十一日終於東京溫柔里
之私第享年三十有六夫人琅邪王氏祖方茂
伯祖方慶唐中書令同中書門下平章事承相

門之慶緒得女則之深規以開元十七年七月二十五日遘疾終於東京壽安縣之別業享年七十有二並以天寶十二載二月十二日同歸祔於京兆府金城縣三陂鄉舊塋東北卅二步禮也嗣子恒前饒陽郡鹿城縣丞云云

此誌於同治時出土今未詳所在因其葬地在興平故屬之興平焉方輿紀要云漢平陵縣屬右扶風故城在今興平縣東北二十里曹魏改曰始平後魏時遷於今治唐景龍二年送金城公主出降吐蕃至此更名金城至德二載改曰

興平 璪曾祖淵見北史隋臣傳改淵作齋云

齋字文懿清河東武城人也本名犯廟諱故改之傳中載淵官爵多與誌合惟誌云淵爲江南遼東二道行軍總管傳但云遼東道誌云淵爵

文安縣開國公傳作文安縣子誌云淵嘗官衛

尉卿傳中未載又傳云淵歷官撫濟二州刺史

隋書本傳作撫濟顯三州刺史

卒於潭州總管此則傳之所有

而誌之所無也傳云淵子名孝廉卽璪祖父孝

雄之兄弟行矣誌云夫人王氏伯祖方慶案方

慶唐時賢相本名緄以字行新唐書有詩誌云

方慶嘗官中書令傳中未載方茂之名宰相世系表亦未載得此可補其闕撰文之張晏官儀王府兵曹參軍儀王名璿元宗子見新唐書十一宗諸子傳 隋書百官志州置總管者列上中下三等總管刺受加使持節上總管行臺尙書僕射爲視從二品中總管行臺諸曹尙書爲視正三品下總管爲視從三品

案上中下總管皆常設之官行

軍總管用兵乃置兵罷衛尉卿正三品上大將則已故稱道不稱州也

軍從二品開國縣公從一品開府儀同三司正四品煬帝改爲從一品新唐書百官志殿中省

監所屬有尙輦直長三人正九品下吏部司勳
郎中一人從五品上太府卿一人從三品禮部
侍郎一人正四品下又百官志上州參軍事四
人從八品下中州參軍事三人正九品下下州
參軍事二人從九品下

落星石題字

陳元錫正書
太和口年

後有元至正朱克明題字

存

題字見金石萃編

此石在興平縣署內海棠軒澧州永定侯韻軒
明府鳴珂同治時權興平縣事後經過其地畱

余宿署內下榻海棠軒中盤桓石下其形如石鼓質甚粗拙而元錫所題之字頗有古趣云

臨潼縣

北魏

離州刺史松滋公元萇振興溫泉頌

正書
無年月

存

全文見金石萃編

今在臨潼縣城內橫渠書院篆額陽文三十六字極其詭異楷法亦沈著痛快古奧絕倫

隋

大隋殘碑

正書

未詳所在

此碑在臨潼縣南門外驪山之麓行臺大門外
俗名二公館咸豐時枝經過其地訪得此石上作佛
像一尊碑石僅存其半有日月不居元鳥降祥
及末行大隋二字可辨因命工拓得十餘紙藏
於篋笥并以分贈同好碑字無多而書法圓勁
可喜隋人楷法每多可觀蓋集魏晉六朝之大
成而開歐虞四家之先路歐陽公集古錄每跋
隋人石刻輒歎賞不置有以也光緒時邑中重
修行臺此石遂不知所在矣

高陵縣

北魏

袁口靳神子等造像記

正書

正光三年八月

未詳所在

全文未見

北周

比邱僧口道軌等十六人題名

正書三列
無年月

未詳所在

魏姚樹等題名

正書四行
無年月

未詳所在

杜禮等造像

正書二列
無年月

未詳所在

杜阿暉等題名

正書二行
無年月

未詳所在

邑師洪遵等題名

正書六行
無年月

未詳所在

趙建宗等造像題名

正書
無年月刻於佛座

未詳所在

全文未見

右北魏造像一種北周造像六種共七種寰宇
訪碑錄云在高陵今均未詳所在矣

唐

魏州昌樂縣令孫義普墓誌銘

正書

文明元年五月

未詳所在

全文見古誌石華續編

誌畧云君諱義普字智周樂安人也曾祖信魏
拜露門博士祖進周晉州長史魏州刺史父乾
隋郾城陳倉二縣令君以明經擢第釋褐魏州

昌樂縣令子承景至孝有聞高材緝譽情深色
養有懷捧檄上元之歲從宦河東奉以之官獲
申溫清而徂春不駐靖樹難追粵以二年正月
二日終於官舍春秋九十有三夫人李氏言容
著美琴瑟克偕逝先風露奄同泉壤承景今任
雍州高陵縣尉聿遵先旨改窆京畿卽以文明
元年五月廿一日卜葬於高陵縣之西南樂安
鄉之偶原禮也

此石本出高陵今未詳所在矣水經注渭水又
東逕霸城縣北

在西安府城東三十里焉

與高陵分水又逕

平阿侯王譚墓北冢次有碑左則涇水注之渭

水又東逕鄠縣南

方輿紀要云廣陽城在臨潼縣北又東北有鄠縣城二縣

均北魏置俱屬馮翊郡焉渭水又東得白渠枝口又東與五

丈渠合水出雲陽縣石門山

洪北江乾隆府廳州縣誌云漢雲陽

縣城在今淳化縣西北六十里方輿紀要云漢雲陽縣城在今淳化縣西北六十里方輿紀要云黃欽山在

水東南流逕黃欽山西

淳化縣東南五十里焉

又南入殷祠縣

方輿紀要云漢殷祠縣城在今耀州治東北一里漢景帝二年

置屬左馮翊師古曰殷音丁活反又丁外反祠讀謂蓋兵禱之名焉

之清水口東南流絕鄭渠又東南入高陵縣逕

黃白城西

方輿紀要云黃白城在本曲梁宮也

南絕白渠屈而東流謂之曲梁水又東南逕高

陵縣故城北方輿紀要云卽左馮翊城在今高陵縣西南二里焉東南絕

白渠又東南入萬年縣漢書萬年縣在櫟陽縣城中太上皇之陵邑也

二縣均屬左馮翊方輿記要云漢櫟陽縣城在今臨潼縣北三十里渭水之北謂之五

丈渠又逕藕原東南流注於渭水經注之藕原

卽此誌之偶原矣水經注又云白渠首起谷口

漢谷口縣屬左馮翊方輿紀要云漢谷口縣城在今醴泉縣東北七十里東逕宜春

城南一作宜春方輿紀要云又東南逕池陽城

北漢池陽縣屬左馮翊方輿紀要云漢池陽縣城在三原縣西北二十里南去涇陽二十八

里枝瀆出焉東南歷藕原下又東逕鄠縣故城

北郭一作彰注見上東南入渭今無水 誌云義普之

曾祖信魏拜露門博士蓋西魏時也北周書沈重傳有露門博士蓋西魏所置而北周沿其舊云

秋官尙書河間公李晦碑入分書永昌元年二月 存

全文見金石萃編

關中金石記云在高陵縣鹿臺鄉案李晦係唐宗室河間元王孝恭次子其事附見新舊唐書孝恭傳所書官爵史與碑合傳云晦爲營州都督以治狀聞爲雍州長史時治有異績碑云故

吏等仰攀盛德遐想徽光蓋實錄矣寰宇訪碑
錄關中金石記皆書爲秋官尙書河間公碑未
著李晦之名又列此碑於代宗時均誤今從金
石萃編改 新唐書百官志光宅元年改刑部
曰秋官京兆尹一人從三品永徽元年改尹曰
長史開元元年復爲尹

亳州錄事參軍馮本紀孝碑

閩朝隱撰子敦直八月
書先天元年十一月

存

全文見金石萃編

關中金石記云在高陵縣城西金石文字記云

在高陵縣西南七里府君廟潛研堂金石文跋
尾云此碑歐趙諸家俱未收錄顧氏金石文字
記始錄之又別出亳州錄事參軍一碑其實卽
此碑之上半誤分爲二目耳余友嚴六希云此碑今已移至高陵城內城隍廟

同朔方節度副使王履清碑

侯冕撰正書
大曆十二年二月

存

全文見金石萃編

寰宇訪碑錄云在高陵縣新唐書百官志節度
使寮屬有同節度副使十人 此碑書法微帶
行體清逸可玩

文安郡王張維岳碑

邵說撰口口膺正書
貞元八年三月

存

全文見金石萃編補遺

碑畧云大厯乙卯歲夏四月有星犯於北落洎
秋九月癸巳大將軍維岳薨於位贈工部尚書
以其年十月乙酉葬於高陵縣奉政原之先塋
公萬人敵也天寶口改服杖劍北趨朔邊屬安
羯稱亂汾陽王郭公子儀偉其材畧引爲步將
清渠之戰特拜左衛將軍遷右衛大將軍乾元
中汾陽盪定咸洛追鈕元惡公加通義大夫太
僕卿封南陽縣男思明繼逆再擾東夏太尉李

光弼扼河陽之險制覃懷之寇公凌堞口口口
擒魁渠矢貫其臂 聖私表異遷銀青光祿大
夫試鴻臚卿僕固懷恩之授鉞也亦仗公以心
腹公閱視材力教之引滿藝成徹札者凡二千
人號曰平射營 今聖踐極改試殿中監進
封開國伯自是走懷義踰九河梟兇逆日聞凱
獲授特進試太常卿進封南陽郡公食以實封
累加開府懷恩之遁封漢中郡王增封一百五
十戶充朔方都知兵馬使公以三軍無帥審於
避嫌駟歸 闕下口食四百五十戶拜左羽林

將軍知軍事公固辭爵邑之大食二百五十戶
丁憂去職柴毀過禮 大君起公於苴經之內
俾復舊官改封文安郡王泣乞終喪抑而不納
遷本軍大將軍錫以金券仍畫像於淩烟閣本
乎世系則隋齊州刺史政之曾孫皇太子家令
元濟之孫豐王府司馬贈靈州大都督履仁之
子議其祥允則益王府長史曼左監門衛率府
錄事參軍杲太子司議郎晟崇文生晁口曰勲
臣之賢將有文安累康屯艱爲邦垣藩焚焚巨
猾射天吠主 口念汾陽專征耀武惟公奮發

願從旗鼓聲自朔裔南馳關輔關輔旣清復東
其旅訓激貔虎戕摧寇虜思明繼逆再擾三河
河陽之師實制殲身桓桓太尉將定諸華忿是
覃懷附於兇邪公擒其帥勦伐居多懷恩授鉞
討除姦羯翳公烈烈遂掃逋孽汾上之潰我成
其功違難遠嫌口口清風訓馭北落聲華有融
如何昊穹而降斯凶贈以冬官洪維飾終轉發
京邑塋歸渭汭精魄何之英名孰繼空畱片石
萬有千歲 貞元八年三月十日建

此碑於道光時出於高陵未經前人著錄今在

高陵縣題銜曰清河張公蓋稱其郡望也維岳
官爵已不爲卑而新唐書無傳案通鑑云安史
之亂諸道用兵是時府庫無蓄積朝廷專以官
爵賞功諸將出征皆給空名告身自開府特進
列卿大將軍下至中郎郎將聽臨事注名其後
又聽以信牒授人官爵有至異姓王者注云信牒未有
告身先給牒以爲信也鳳枝案唐之信牒諸軍
卽今捐納官職未領執照先給實收之類但以職任相統攝不復計官爵高下及清渠之
敗復以官爵收散卒由是官爵輕而貨重大將
軍告身一通纔易一醉凡應募入軍者一切衣

金紫至有朝士僮僕衣金紫稱大官而執賤役者名器之濫至是而極焉碑云維岳於清渠之戰特拜左衛將軍卽至德二載郭子儀與安守忠戰清渠之敗以官爵收散卒時也碑又云維岳畫像凌烟閣考凌烟畫像功臣位次見新唐書一百六十卷忠義傳上而無維岳之名案畫像者武德功臣十六人貞觀功臣五十三人至德功臣二百六十五人大中初又續圖三十七人共三百七十一人今傳中有名者僅一百八十七人則傳中未經列名者固不僅維岳一人

也豐王名珙元宗子益王名迺代宗子均見新
唐書十一宗諸子傳中 撰文之邵說見新唐

書文藝傳藝文志云說有集十卷是說於當時
固有文名者此碑敘事未見筆法惟銘詞鏗鏘
壯健朗朗可誦不愧大手筆焉碑中北落字兩
見案史記天官書云虛宿其南有眾星曰羽林
天軍軍西爲壘或曰鉞旁有一大星曰北落師
門一星在羽林西南天軍之門也長安城北落
門以象此也

鉞旁謂鉞星之旁鉞星之旁鉞星之旁

新唐

書百官志左右衛將軍各二人從三品大將軍

各一人正三品文散階正四品下曰通議大夫

史作議
碑作義

太僕寺卿一人從三品七等爵開國縣

伯食邑七百戶正四品上鴻臚寺卿一人從三

品左右羽林將軍各三人從三品大將軍各一

人正三品東宮官太子家令寺家令一人從四

品上司議郎二人正六品上左右監門衛率府

錄事參軍各一人正九品上崇文館學士二人

貞元八年隸左春坊有館生十五人碑云絳岳

子爲崇文生卽其職也

內侍省內侍李輔光墓誌銘

崔元畧撰崔巨雅正書
元和十年四月

全文見古誌石華

存

誌云遷窆於涇陽縣咸陽原之陰

此誌今在高陵縣署石墨鐫華云輔光之葬在咸陽東北近涇萬厯中涇岸崩壅水不流三日乃得茲石其銘云水竭原遷斯文乃傳適符其事案誌云窆于涇陽之咸陽原而此誌則出高陵蓋涇陽之東卽高陵界也雍州金石記云巨雅乃元畧之兄以弟已書姓故止書名耳此誌書法秀逸董香光楷法所自出也

西平郡王李晟碑

裴度撰柳公權正書
大和三年八月

全文見金石萃編銘詞全錄

今在高陵縣案石墨鐫華云碑在高陵縣王墓
前已磨泐不可讀矣是趙子函所見之本久已
剝缺當係原碑而近來拓本文字完全如新刻
者惟書法稚弱不似柳河東筆竊嘗疑爲雁本
嗣閱潛研堂金石文跋尾云碑經後人重開雖
間架尙存而神采頓減如裴晉公署銜當云特
進守司空今譌守爲爵俗生不通官制以意妄
改甚可笑也又抱經堂文集云唐文宗年號大

利本是大小之字今碑中於大字內增一點作
太亦後人妄加也三國魏明帝北魏孝文帝是
太和唐文宗則是大和他碑咸可據得此二說
此石爲重刻無疑矣而翁覃溪氏方綱帖經舉
隅則謂柳書以此碑爲最佳云世人稱此碑
爲三絕謂西平功業晉公文章河東書法也今
案晉公所撰碑序亦係應制常體銘辭則鏗鏘
可誦備錄如左其詞曰

建中季年大盜忽焉 皇輿避狄狩於梁川顧
謂太師汝才汝畧將威致討必殄寇虐太師泣

奉捐軀誓眾度其成城可以利用赫矣鋪敦傳

於墻垣手搏足跣如衝如援

援乃援字之一鼓
謫詳考見下

而破一麾而奔掃清宮闕刷盪妖昏我師莅止

我令行矣都人不知已事方喜飛章告慶飭

駕言旋鴻烈耀古謹聲動天車服之錫河山之

誓九命而俯一心若厲俾候於岐阜安邊陲藩

政既成袞職攸宜嶽降帝賚天言詭辭 我后

嘉猷我躬何爲道直氣和勞謙終吉福履所綏

未享萬一上天不惠厚宥遄歸垂裕流光用延

恩暉翼子肥家將壇台席繼立奇功代傳休績

聽與伯仲

聽西平王之子之名

永懷高蹤請於

朝廷表

是邱封

帝曰孝哉胡可不從宣

我祖之不

業翳爾父之嘉庸乃

詔作銘以觀億齡

案銘中如衝如援援當從手作援蓋用大雅皇矣篇以爾鉤援與爾臨衝故事

御纂詩

義折中云鉤援梯也臨臨車衝衝車也蓋言攻

城之具今石刻誤作援援呼願切說文援履法也俗作植與援字義別宜正之又銘中天言詭辭天字當係矢字未知確否唐人多善詩詩本風雅頌故秦漢以後有韻之文惟唐爲盛

鄆縣

隋

李淵爲子祈疾疏

正書

大業元年十一月宋人重刻

存

全文見金石萃編

今在鄆縣草堂寺係宋人重刻字迹平庸無足
觀也又有大海寺造像記正書在河南滎陽縣
南寺亦係淵製爲世民造像求福者係原刻字
類歐陽率更可寶也

唐

吏部南曹石幢

左光允撰序并匡雅撰頌正書

存

序頌見金石萃編

今在鄠縣草堂寺新唐書百官志吏部員外郎
二人從六品上一人判南曹此幢列名之人皆
南曹令史也

圭峰定慧禪師碑

裴休撰并正書
大中九年十月

存

全文見金石萃編

今在鄠縣草堂寺

藍田縣

北魏

邑子羅暉等造像題名

正書
無年月

存

全文見金石萃編補遺

唐

淨住寺智悟律上人墓誌銘

裴適時撰正書
大厯六年十二月

存

全文見古誌石華續編

誌畧云公俗姓劉諱仲立彭城郡人也曾祖如
願祖元福皇華州下邳縣令公則下邳之愛子
也行年六十有五殞於來庭坊之私第以大厯
六年十二月葬於藍田縣鍾劉村之東原禮也
公在俗有子四人長子會州黃石府別將賜緋
魚袋光歸次子朝議大夫守內侍省奚官局令

上柱國光順第三子朝議郎守內侍省內府局
今上柱國光玘季子絳州新田府折衝賜紫金
魚袋上柱國光暉等云云

此誌近時出藍田新唐書地理志會州屬關內
採訪使而無黃石府之名得此可補其闕焉百
官志諸衛折衝府別將各一人上府正七品下
中府從七品上下府從七品下內侍省奚官局
令二人正八品下誌中但敘曾祖祖父而未載
其父之名亦他誌所罕見者

空寂寺大福和上碑

陸海撰沙門惟嵩行書
寶刻類編云寶應二年立

存

全文見金石萃編補遺

今在藍田縣新建胡大令

元熹

重修縣志載其

全文并云書法頗佳有李北海筆意雖漫漶頗
甚尙可句讀前代考據金石家皆未著錄惟宋
陳思寶刻叢編載其目近時碑估搜出始行于
世

葉護鎮經幢

正書
無年月

存

呂子玕孝廉

申

訪得此幢于葉護鎮葉護一作

洩湖

關中金石文字存逸考卷六